

欽定全唐文

欽定全唐文卷一百目錄

滕王湛然

太子少傅竇希瑊神道碑

許王瓘

樂九成賦

信安郡王禕

請宣示御製華岳碑文表

彭王志暕

興聖寺主尼法澄塔銘并序

皇太子瑛

請宣付耕耤祥瑞奏

頴王璬

請改修龍池聖德頌表

永王璘

報吳郡採訪使李希言牒

澤王漣

光祿卿王公墓誌銘并序

建寧郡王俊

請收兵討賊啟

金城公主

謝恩賜錦帛器物表

乞許贊普請和表

請置府表

欽定全唐文卷一百

滕王湛然

湛然滕王涉子嗣爵官殿中監貞元五年爲太子賓客充  
回紇使

太子少傅竇希誠神道碑

若夫懸象著明保傅繫三台之位厚德載物公侯分五嶽  
之尊環曜魄而布陰陽佐林蒸而平水土斯所以寅亮天  
地寧濟寰區自匪器稟英靈藝兼文武發揮成務之本模  
楷具寮之德則何以弼諧邦教調護元良粵惟纂懿前修

追蹤上哲總淳粹以秀出偶會昌而挺生賢戚載彰寵光  
崇貴者其在我司空幽國公乎公諱希瑊字美玉扶風平  
陵人也昭成皇太后之介弟開元神武皇帝之元舅即隋  
工部侍郎左右武候大將軍納言司空上柱國陳國公抗  
之曾孫皇朝駙馬都尉工部禮部二尚書右領軍大將軍  
殿中監光祿大夫上柱國莘國公誕之孫太常卿潤州刺  
史贈太尉荊州大都督上柱國幽國公孝湛之元子也而  
自祥生石紐祚啟金刀盛業與塗山比崇長發將觀津方  
永文昭武穆帝載矢之於典謨累將重侯后族布在於方

冊故得國華人傑躡振古以騰芳服冕乘軒迄昌辰而益  
茂莫不歌鐘繼響喧喧連北里之音邸館相望藹藹並東  
都之盛厯代之所推挹豈可一二談哉公鼎袖標華公門  
孕秀仰庇軒星之曜傍吞閒氣之英天生仁智之姿日用  
溫恭之性弱齡志尚卓爾多奇阮瑀之朗朗無雙黃憲之  
汪汪不測豈可同年而語也年十有五補修文館學生鼓  
篋上庠橫經太學中年考校僉我大成屬穹昊降災高皇  
厭代白雲方馭攀鳳駕而無追素幘爲郎翊龍輶而暫往  
既調授潞州參軍尋遷常州司兵參軍事上黨關山毘陵

郡邑既承君子之命又參從事之班夫惟濫觴蓋茲而始  
秩滿入拜安國相王府功曹參軍久之遷爲屬時睿宗之  
藩潛龍德在田猿岩尚啟累接曳裾之侶屢陪飛蓋之遊  
樂善載歡承恩莫二唐景雲元年睿宗登極加朝散大夫  
除殿中尚食奉御黃金兼錫朱紱增榮調九拂於宸羞薦  
八珍於帝膳景龍元年又遷爲太府少卿兼知尚食事司  
帑藏之珍賚奉雲天之宴樂幾承恩獎增峻寵章二年加  
銀青光祿大夫殿中監乘輿服物御府斯殷纂慎日宣爪  
牙尤寄曾未踰朔又拜左右千牛衛將軍而帝謂公曰朕

昔在藩嘗居此職而其宿衛親近今故授卿其承寵私有  
若是也衛鈞陳於北極應上將於南蕃榮冠等夷地兼勲  
戚雖古之位踰九卿班同三府者亦無以方焉先天元年  
遷金紫光祿大夫右散騎常侍兼檢校光祿卿無何又正  
除光祿侍中同掌即珥貂蟬郎中改名攸司殿掖豈有高  
堂擅青龍之疏張湛推白馬之名兼而有之不其榮矣開  
元二年遷太子少傅襲爵幽國公加賜食實封二百戶以  
六行之姿翼千鈞之務琢磨光乎玉裕輔導整於銅樓有  
華廩之清簡富匡衡之法義庶常儀刑八座通籍二宮福

履有縗降年惟永而過隙之影背闔閨以言旋但閻川之  
波辭少海而無返開元五年歲在丁巳冬十月丁巳朔二  
十日丙子暴薨於東都章善里之私第春秋五十有四嗚  
呼哀哉慟感宸旒有切渭陽之念哀纏士庶逾深鄭國之  
悲粵翌日聖上舉哀於洛城南門輶朝三日贈司空荊州  
大都督賻物八百段米粟八百石及東園祕器凶事葬事  
官給務令優厚仍令將作大匠韋湊充使監護河南少尹  
秦守一爲副鴻臚少卿李禹持節齎璽書弔祭儀仗送至  
墓所并爲立碑發引之日令工部尚書劉知柔祖祭有司

考行謚曰某禮也渥命優洽事越彝典惟公降靈純嘏稟秀中原風範自高衣冠甚偉雖地稱金穴外家之寵克崇位翊璫山儲輔之尊斯在而謙以約己德以潤身九列重其章明百寮仰其忠儉夫所謂貴而不驕志明而晦者無迺於公乎名命雖臨濛暉莫駐佳城鬱鬱遽開京兆之阡詔葬紛紛即赴畢原之路旌旄飛翻而笳鼓噎思容御動而行路悲嗣子朝散大夫行太子典設郎鍊次子太子內直郎銅等銜恤哀毀退而不及粵以開元六年夏四月九日癸酉歸葬於京兆咸陽縣洪瀆川之北原八水分流五

陵交對星辰照爛於東井煙景密邇於西岳龜言筮告此  
地攸安萬古千春德音何託惟披文與相質恪奉絲綸冀  
地久而天長永昭徽範下才不敢述銘曰

昭昭茂族赫赫崇庸石紐疏系金刀建封軒星代稟閒氣  
時鍾鳴陰必嗣嘯谷相從越洎我公秉心貞吉肇遊庠序  
厯登天秩東郡勞人西都賦質龍飛偶運鵬圖匪日絲綸  
驟委章紱增榮旣典六尚俄昇九卿鉤陳任切武衛姿英  
左右惟允於斯作程獻贊嘉猷載司光祿琢磨儲範方調  
鼎餗懵矣神心宜哉倚伏曾不遐壽奄焉薨覆帝念元舅

情深渭陽輶朝興慟詔葬哀傷亟峻典禮逾崇寵章鼎門  
南出畢陌西長旆引輶軒笳隨魂輶容衛哀咽山川迴互  
秦塞從指漢原已暮紀盛烈於豐碑庶有旌於武庫

許王瓘

瓘許王素節子神龍初襲爵開元十一年爲衛尉卿下遷  
郢州別駕除邠州刺史祕書監守太子詹事天寶六載卒  
贈蜀郡大都督

樂九成賦

唐在六葉將修封禪想與靈接乃冠顥色佩朝陽瑱瑤碧

之明潤屑桂椒之芳香曰予意夫放歎光明重華風聲鬢  
鬢兮陽靈之宇嬋娟兮介邱之平先大樂緝正聲更協五  
變親和九成均鳴絲於金竹參雲門與咸英使子野奪意  
伶倫喪精帝於是搖翠竿於東國翳華芝而遂行然猶左  
却宓妃右屏西子寵罷金屋歡辭瑤水豈修蛾之敢迴匪  
清臚之能視飛燕心折毛嬌色沮朝雲之姣兮不能呈其  
妍絕代之治兮無所施其美況肯選無限情未央將與昭  
陽比盛傾官相望仍復斥鄭衛捐倡優靡曼無取淫哇不  
留淮南兮激楚荆歌兮趙舞長袖更進新聲自許嬌彩雲

之徘徊拂錦茵而容與能使秦帝熒惑漢皇延佇度曲東  
城橫態北渚莫不卷襞而索無處所庾疑射兕之騁驚役  
誇胡之豫遊去翠被與豹舄疑及驛鷗復想像雲

夢彷徨青邱麋麞熊羆之藪灌莽陵岡之幽於中爲樂騎

疑

及驛鷗復想像雲

矜未休荒淫震蕩其誠不修將穆然儲思粹清高想意授  
招搖兮往若而疑至乃建玉旛之光耀動金根之逶迤丹  
虯翊輦白武銜蕤後舞元鵠前鳴長離清壇下蔚高烟上  
馳故能決地闢開天維降青元兮來斯登黃靈兮遲遲江  
畔之茅抽三脊北里之禾滿芳席睢上之黃龍兮瑞以多

願持朱鴈兮薦天歌明德既享靈心每和宜其日炷中峯  
雲煙上帝光五色聲萬歲氣非煙風若蕙勲侔成山碣石  
澤比漲海洪波茲所以庶高宗之美豈七十二君之足多  
孰與雄奢騎貴逞欲矜意貪靈好奇恃力誇資惑方士之  
說邀羨門之期果爲風雨所中神仙見期歷琅邪兮徒遠  
望蓬萊兮幾時者哉

信安郡王禕

禕吳王恪孫嗣江王囂封嗣江王爲太子僕兼徐州別駕  
加銀青光祿大夫厯蔡衢等州刺史開元後累轉蜀濮等

州刺史入爲光祿卿遷將作大匠十二年改封信安郡王  
拜左金吾衛大將軍遷禮部尚書充朔方節度使拔吐蕃  
石堡城拓地千里元宗喜更號其城曰振武軍契丹衙官  
可突干叛勅禪副忠王爲河北道行軍元帥王不行禪率  
諸將分道出范陽北大破多蕃擒酋長以還加開府儀同  
三司兼關內支度營田採訪處置等使久之擢兵部尚書  
爲朔方節度大使坐事下除衢州刺史厯滑懷二州天寶  
初以太子少師致仕二年遷太師未拜薨年八十餘

請宣示御製華岳碑文表

臣伏見御製西嶽碑文來從上元光照下土羣臣捧戴遊  
聖難名臣聞天作高山氣雄茲嶽壓洪河而傑起凌蒼昊  
而孤標近當國門用固京邑自巨靈開拓往帝巡遊精意  
嘗聞頌聲則未非勝賞難就蓋詞翰無能不遇非常之君  
孰覩非常之事陛下知其若此金聲而玉振之乃發揮睿  
詞幽贊神化廣大極天地光明融日月至理動清微至功  
含造化合而成體散而成章巍乎煥乎不可得而稱也又  
復親紆彩筆寫在香牋隨手生姿入神變態勢如飛動妙  
絕古今諒得之自然豈因之外物對揚天休臣子之常也

美而無述過莫大焉請以御製碑文頒示四海使伊昔之  
后自愧不才率土之臣咸知所謂則雖死之日猶生之年

彭王志暕

志暕彭思王元則曾孫嗣爵開元中官宗正卿加上柱國  
厯左千牛衛上將軍

興聖寺主尼法澄塔銘

并序

法師諱法澄字无所得俗姓孫氏樂安人也吳帝權之後  
祖榮涪州刺史父同同州馮翊縣令法師第二女降精粹  
之氣含宏量之誠大惠宿持靈心早啟鑒浮生不住知常  
次定全書文

樂可依託事蔣王求爲離俗遂於上元二年出家威儀戒  
行覺觀禪思跡履真如空用恒捨遂持瓶鉢一十八事頭  
陀山林有豹隨行逢神擁護於至相寺康藏師處聽法探  
微洞悟同彼善才調伏堅持寧殊海意康藏師每指法師  
謂師徒曰住持佛法者即此師也如意之歲淫刑肆逞誣  
及法師將扶汝南謀其義舉坐入宮掖故法師於是大開  
聖教宣揚正法歸投者如羽翮趨林藪若鱗介赴江海昔  
菩薩化爲女身於王後宮說法今古雖殊利人一也中宗  
和帝知名放出中使供承朝夕不絕景龍二年大德三藏

等奏請法師爲紹唐寺主勅依所請今上在春宮幸興聖  
寺施錢一千貫充修理寺以法師德望崇高勅補爲興聖  
寺法師修緝畢功不逾旬月又於寺內畫華嚴海藏變造  
八角浮圖馬頭空起舍利塔皆法師指授規模及造自餘  
功德不可稱數融心濟物遍法界以馳神廣運冥功滿虛  
空而遇化不能祗理事塗請解寺主遂抄華嚴疏義三卷  
及翻盂蘭盆經溫室經等專精博思日起異聞疲厭不生  
誦經行道視同居士風疾現身乃臥經二旬飲食絕口起  
謂弟子曰我欲捨壽不知死亦大難爲當因緣未盡後月

餘儼然坐繩牀七日不動惟聞齋時鐘聲即喫水忽謂弟子曰扶我臥我不能坐死臥訖遷神春秋九十開元十七年十一月三日也以其月廿三日安神於龍首山馬頭空塔所門人師徒弟子等未登證果豈知鶴林非永滅之場驚嶺是安禪之所號慕之情有如雙樹法師仁孝幼懷容儀美麗講經論義應對如流王公等所施悉爲功德弟子嗣彭王女尼彌多羅等恐人事隨化陵谷遷移紀德鐫功乃爲不朽銘曰

易高惟一道尊自然大法雄振豈曰同年優陀花色曇彌

稱賢錯落倫次師在其間濟彼愛河拯斯苦海導引羣類  
將離纏蓋不虛不溢常住三昧是相無定隨現去來雙林  
言滅金棺復開有緣既盡歸向蓮臺衆生戀慕今古同哀

皇太子瑛

瑛元宗第二子本名嗣謙景雲元年九月封真定郡王先  
天元年八月進封郢開元三年正月立爲皇太子十年加  
元服十三年改名鴻二十五年改今名武惠妃有寵蠶瑛  
楊洄希旨譖瑛將爲亂惠妃證成之廢爲庶人俄賜死城

東驛

請宣付耕藉祥瑞奏

一昨正月二十七日伏見陛下於興慶宮親耕三百餘步  
既而青光紫氣覆地臣等聞舜在厯山之下人微之事也  
漢有鉤盾之間兒童戲之猶正經所尚良史稱多況陛下  
運德協靈聖情逮物上爲宗廟下預黔黎躬耕藉田天下  
幸甚較其盛禮百倍於三推考其嘉瑞獨高於千古而九  
霄四遠中外阻絕冢司莫縣見直筆所未聞使帝跡不激  
揚聖美不昭晰皆臣子之過也是以臣等冒昧上陳伏乞  
恩慈令宣示朝廷錄付史館則罄天率土殊情同幸

頴王璬

璬元宗第十三子初名澣開元十三年封頴王遙領安東  
都護平盧軍節度大使加開府儀同三司改今名安祿山  
反除蜀郡大都督劖南節度大使歸京師建中四年薨年  
六十六

請改修龍池聖德頌表

臣等伏以龍池肇慶寶祚攸章聖德動天祐符薦至臣等  
憤深家國志願光揚去開元二十二年於東京朝堂上表  
請建龍池聖德頌曲蒙天眷俯遂微誠其時修營已就刻

石所爲頌文未備敘事多遺述聖談天萬不舉一既乖士  
庶之望莫展宗臣之心尋請改修冀昭聖德斐然雖竭於  
愚思翰墨未絕於貞石今屬靈符降祉景命維新天寶之  
號再加郊廟之儀式展誠合書其寶錄光闡徽猷綴集前  
文以存不朽特望天恩更許編錄則聖德鴻業紀而無遺  
聖美形容於茲允備無任勤懇之至謹奉表陳情以聞

永王璘

璘元宗第十六子開元十三年封永王遙領荊州大都督  
加開府儀同三司安祿山反詔璘赴鎮又領山南江西嶺

南黔中四道節度使璘至江陵募士得數萬遂有窺江左  
意會吳郡採訪使李希言平牒璘璘怒乃襲希言肅宗遣  
宦者啖廷瑤等招諭之璘懼奔嶺外至大庾嶺爲江西採  
訪使皇甫侁所殺

報吳郡採訪使李希言牒

寡人上皇天屬皇帝友于地尊侯王禮絕寮品而簡書來  
往應有常儀今乃平牒抗威落筆署字漢儀隳紊一至於  
斯

澤王憲

澧澤王上金孫嗣爵大厯中官祕書監遷光祿卿

光祿卿王公墓誌銘

并序

公諱訓字訓瑯琊臨沂人也永穆大長公主之中子昔周文授圖靈王纂膺誕我太子晉晉有儀鳳之瑞瑞流子孫粵王氏焉爲異姓首曾祖知道皇贈魏州刺史祖同咬皇光祿卿駙馬都尉贈太子少保尚定安長公主父繇皇特進太子詹事駙馬都尉贈太傅尚永穆長公主龍種鳳雛長淮積潤文武間出衣冠實繁譜牒稱之豪族鐘鼎傳於不朽公文備四教學通六藝博聞雅量厚德高明三歲尚

輦奉御四轉至光祿卿早年娶嗣紀王鐵城之季女也夫  
人尋逝有女方笄生人之哀孤遺之極後尚博平郡主癸  
卯歲居鄧州別業因中風疾遂還京師公主聲茲上藥竭  
以秦醫千禳萬療月衰日羸若使經方有徵公亦保合於  
永年矣嗚呼春秋卅一大厯二年己月癸巳奄終鳳樓之  
右中使弔贈度僧尼以追福公主崩心震悼哀過禮經孝  
子郊柴毀骨立古今未聞其年八月七日遷厝萬年縣澠  
川鄉澠川之原禮也嗚呼生涯畢矣龜兆始安青門始啟  
朱轡方引返哺之聲絕矣倚門之望休焉銘曰

龍渠之右鳳城之東岡原夾輔十宅叶同山開黃壤地列  
青松萬古已矣千年實封多才多藝惟聰惟惠如松之盛  
如川之逝陵谷將平石記爰旌長懷令德永頌英聲

建寧郡王俊

俊肅宗第三子天寶中封建寧郡王授太常卿同正員元  
宗幸蜀百姓遮留太子俊因勸趣河西收河朔軍謀興復  
遂從肅宗北上渡渭日數十戰常身先三軍屬目至靈武  
肅宗即位議以俊爲天下兵馬元帥左右固請廣平王乃  
更詔俊典親兵張良娣與李輔國交構圖危皇嗣俊忠謇

數言之反譖其有異志遂賜死代宗立追贈齊王大厯三年詔以俊當艱難首創大謀中興有功進謚承天皇帝

請收兵討賊啟

逆胡犯闕四海分崩不因人情何以興復今殿下從至尊入蜀若賊兵燒絕棧道則中原之地拱手授賊矣人情既離不可復合雖欲復至此其可得乎不如收西北守邊之兵召郭李於河北與之併力東討逆賊克復兩京削平四海使社稷危而復安宗廟毀而更存掃除宮禁以迎至尊豈非孝之大者乎何必區區溫清爲兒女之戀乎

金城公主

公主邠王守禮女出降吐蕃棄緒縮贊太和中歸國薨

謝恩賜錦帛器物表

金城公主奴奴言仲夏盛熱伏惟皇帝兄起居萬福御膳  
勝常奴奴奉見舅甥平章書云還依舊日重爲和好旣奉  
如此進止奴奴還同再生下情不勝喜躍伏蒙皇帝兄所  
賜信物並依數奉領謹獻金盞羚羊衫段青長毛氈各一  
奉表以聞

乞許贊普請和表

金城公主奴奴言季夏極熱伏惟皇帝兄御膳勝常奴奴  
甚平安願皇帝兄勿憂此間宰相向奴道贊普甚欲得  
和好亦宜親署誓文往者皇帝兄不許親署誓文奴奴降  
番事緣和好今乃騷動實將不安和矜憐奴奴遠在他國  
皇帝兄親署誓文亦非常事即得兩國久長安穩伏惟念  
之

請置府表

妹奴奴言李行禕至奉皇帝兄正月勅書伏承皇帝萬福  
奴惟加喜躍今得舅甥和好永無改張天下黔庶並加安

樂然去年崔琳迴日請置府李行禕至及尚他辟迴其府  
事不蒙進止望皇帝兄商量矜奴所請

欽定全唐文卷一百一目錄

新文藝出版社藏書

梁太祖

一

受禪改名令

受禪改元制

授錢鏐太尉制

令同華雍等州招諭制

黜罰使臣制

南郊恩制

委宰臣專判祭祀制

求賢制

禁軍吏誅求制

禁用軍焚掠制

日食求言制

貶相州刺史李思安制

加恩前朝官寮詔

定封冊禮詔

恤征役詔

令諸州撲蝗詔

亢陽修政詔

崇節儉詔

定鞍飾等級詔

修祀典詔

給百官俸料詔

申謝南郊詔

祭告東岳詔

追贈張策等官詔

討劉知俊懸爵賞詔

禁僞造犀玉詔

求賢詔

遣官分祀風神詔

嚴關防詔

賑貸滑宋等州詔

令冀王友謙將兵詔

令行營招諭歸降詔

處置北面招討使胡規擾民詔

嚴憲注擬蠹弊詔

暑月施恩詔

遣官祈雨詔

禁長吏誅求詔

求言詔

以潼關仍隸陝州勅

禁使臣逗留勅

答錢鏐奏勅

許開坊市燃燈勅

改酸棗等九縣屬開封府勅

升陽山爲赤縣勅

賞張溫等勅

定門禁勅

申明門禁勅

欽定全唐文卷一百一

梁太祖

帝姓朱氏諱晃初名溫宋州碭山人唐大中六年生初從黃巢尋降於河中節度使王重榮重榮表奏僖宗授左金吾衛大將軍賜名全忠天復元年封梁王天祐二年加相國改封魏王備九錫四年四月受唐禪改今名開平三年加尊號睿文聖武廣孝皇帝在位六年年六十一謚曰神武元聖孝皇帝廟號太祖

受禪改名令

闕

王者創業興邦立名傳世必難知而示訓從易避以便人  
或稽其符命應彼開基之義垂諸象德之言爰考簡書  
求於往代周王昌發之號漢帝詢衍之文或崇一德以徽  
稱或爲二名而更易先王令典布在縗絹寡人本名兼於  
二字且異帝王之號仍兼避易之難郡職縣官多須改換  
況宗廟不遷之業憲章百世之規事叶典儀豈憚革易寡  
人今改名晃是以天意雅符於明德日光顯契於瑞文昭  
融萬邦理斯在是庶順元穹之意永臻康濟之期宜令有  
司分告天地宗廟其舊名中外章疏不得更有迴避

受禪改元制

王者受命於天光宅四海祇事上帝寵綏下民革故鼎新  
諒厯數而先定創業垂統知圖籙以無差神器所歸祥符  
合應是以三正互用五運相生前朝道消中原政散瞻烏  
莫定失鹿難追朕經緯風雷沐浴霜露四征七伐垂三十  
年糾合齊盟翼戴唐室隨山刊木罔憚胼胝投袂揮戈不  
遑寢處洎上穹之所贊知廣運之不興莫諧輔漢之謀徒  
罄事殷之禮唐主知英華已竭算祀有終釋龜鼎以如遺  
推劖紱而相授朕懼德弗嗣執謙允恭避駿命於南河眷

清風於潁水而乃列嶽羣后盈廷庶官東西南北之人斑  
白緇黃之衆謂朕功蓋上下澤被幽深宜應天以順時俾  
化家而爲國拒彼億兆至於再三且曰七政已齊萬幾難  
曠勉遵令典爰正鴻名告天地神祇建宗廟社稷顧惟涼  
德曷副樂推慄若履冰凜如馭朽金行啟祚玉厯建元方  
宏經始之規宣布維新之令可改唐天祐四年爲開平元  
年國號大梁書載虞賓斯爲令範詩稱周客蓋有明文是  
用先封以禮後嗣宜以曹州濟陰之邑奉唐主封爲濟陰  
王凡曰軌儀並遵故實姬庭多士比是殷臣楚國羣材終

爲晉用厯觀前載自有通規但遵故事之文勿替在公之效應是唐朝中外文武舊臣見任前資官爵一切仍舊凡百有位無易厥章陳力濟時盡瘁事我古者興王之地受命之邦集大勲有異庶方霑慶澤所宜加等故豐沛著啟祚之美穰鄧有建都之榮用壯鴻基且旌故里爰遵令典先示殊恩宜升汴州爲開封府建名東都其東都改爲西都仍廢京兆府爲雍州佑國軍節度使

授錢鏐太尉制

集非常之事必有挺非常之才建第一之功必有居第一

之位朕膺圖受命負扆開階未嘗以真太尉之官輕於擬議大司闕之職易於簡求蓋由其爵尊其任重不有英佐孰當異恩啟聖匪運同德功臣淮南鎮海鎮東等軍節度使淮南浙江東西等道管內觀察處置充淮南四面都統營田安撫兼兩浙鹽鐵制置發運等使開府儀同三司檢校太師兼中書令杭越等州大都督府長史上柱國吳越王食邑一萬五千戶實封一千戶錢鏐海岳騰英星雲誕秀契君臣咸一之德有文武兼備之才宣慈惠和忠正廉毅敦詩說禮樹百行於藩維去暴除奸敵萬人於帷幄弼

予興運明乃嘉謨頃屬淮彝不賓王化自爾益封吳會兼  
鎮廣陵追擒每盡於隻輪覆溺連收其巨艦復聞奸宄屢  
擾巡封謂天蓋高若水可恃爾又橫戈憤悱獨力支吾妙  
運神機大殲戎醜元雲陣起雄風驅下瀨之師白露圍開  
沴氣散常州之化再安生聚重復土疆薛公之三策咸明  
漢主之一奇斯在況早攀鱗翼備見肺腸同德同心二紀  
密參於締構惟忠惟孝四方咸則於儀刑苟非劇恩何以  
加賞是用鏤於彝鼎冊以輶車擬呂望之尊崇正列侯之  
貴重仍加眞食復寵兼官式是獎酬且旌忠烈於戲進以

正大易所以經邦慎厥終格言用之居位勉思遵守克荷  
寵靈服予訓辭錫爾繁祉可守太尉加實封二百戶餘並  
如故

令同華雍等州招諭制

左馮背叛元惡遁逃如聞相濟之徒多是脅從之輩若能  
迴心向國轉禍全身當與加恩必不問罪仍令同華雍等  
州切加招諭如能梟斬溫韜或以鎮寨歸化必加厚賞仍  
獎官班兼委本界招復人戶切加安存

黜罰使臣制

朝廷命使臣下奉行唯於辭見之儀合守敬恭之道近者  
凡差出使往復皆越常規或已辭而尚在本家或未見而  
先歸私第但從己便莫稟王程在禮敬而殊乖置典章而  
私舉宜令御史臺別具條流事件具黜罰等奏聞

南郊恩制

夫嚴祀報本所以通神明流澤覃休所以惠黎庶斯蓋邦  
家不易之道皇王自昔之規敢數大猷茲惟古義粵朕受  
命於今三年何嘗不寅畏晨興焦勞夕惕師唐虞之典上  
則於乾功挹殷夏之源下涵於民極欲使萬方有裕六辨

無愆然而志有所未孚理有所未達致奸宄作釁旱霪爲  
災騎將守邊擁牙旗而背義積陰馭氣陵玉燭以干和載  
考休徵式昭至警朕是以仰高俯厚靡惜於貴躬履薄臨  
淵冀昭於元覽兢兢慄慄夙夜匪寧及夫動干戈而必契  
靈誅陳犧粢而克章善應苟非天垂丕祐神贊殊休則安  
可致夷凶渠就不戰之功變滲戾氣作有年之慶況靈旗  
北指喪犬羊於亂轍之間飛騎西臨下鄜翟若走丸之易  
息一隅之煙燧復千里之封疆而又掃蕩左馮討除峴首  
故得外戎內夏益知天命之攸歸喙息跂行共識皇基之

永固仰懷昭應欲報無階爰因南至之辰親展圜丘之禮  
茲惟大慶必及下民乃宏渙汗之私以錫疲羸之幸所冀  
漸臻蘇息亟致和平噫朕自臨御已來歲時尚邇氛昏未  
殄討伐猶頻甲兵須議於餽糧飛輓頻勞於編戶事非獲  
已慮若納隍宜所在長吏倍切撫綏明加勉諭每官中抽  
差徭役禁猾吏廣斂貪求免至流散靡依凋弊不濟宜令  
河南府開封府及諸道觀察使切加鈐轄刺史縣令不得  
因緣賦斂分外擾人凡關庶獄每尚輕刑只候纔罷用軍  
必當便議優給德音節文內有未該者宜令所司類例條

件聞奏

委宰臣專判祭祀制

國之大事惟祀與戎祭法所標禮經猶重其齊心必至備物精臻方感召於神祇乃降通於福祐近者所司祠祭或聞官吏因循虛破支供動多虧闕致陰陽之失序仍水旱以爲災每一念思實多凜若宜加提舉用復敬恭須委元臣以專重事自今後應在京四時大小祀及諸色祭祀並委宰臣貽矩專判躬親點簡無令怠墮有失典常

求賢制

自開創以來凡有赦書德音節文內皆委諸道搜訪賢良  
尚慮所在長吏未切薦揚其有卓犖不羈沈潛用晦負王  
霸之業蘊經濟之謀究古今刑政之源達禮樂質文之奧  
機籌可以制變經術可以辨疑一事軼羣一才拔俗並令  
招聘旋具奏聞然後試其所長待以不次所貴牢籠俊傑  
採摭英翹

禁軍吏誅求制

戎機方切國用未殷養兵須藉於賦租輓粟尚煩於力役  
所在長吏不得因緣徵發自務貪求苟有故違必行重典

立法垂制詳刑定科傳之無窮守而勿失中書門下所奏  
新定格式律令已頒下中外各委所在長吏切務遵行盡  
革煩苛皆除枉濫用副哀矜之旨無違欽恤之言

禁用軍焚掠制

扈氏不恭固難去戰鬼方未服尚或勞師其蟻聚餘妖狐  
鳴醜類棄天常而拒命據地險以偷生言事討除將期戡  
定問罪止誅於元惡延災可憫於遺黎每念傷痍良深愧  
歎應天兵所至之地宜令將帥節級嚴戒軍伍不得焚燒  
廬舍開發邱壠毀廢農桑驅掠士女使其背叛之俗知予

弔伐之心

日食求言制

兩漢已來日蝕地震百官各上封事指陳得失蓋欲周知時病盡達物情用緝國章以奉天誠朕每思逆耳罔忌觸鱗將洽政經庶開言路況茲謫見當有咎徵其在列辟羣臣危言正諫極萬邦之利害致六合之殷昌毗予一人永建皇極

貶相州刺史李思安制

懷州刺史段明遠少年治郡庶事惟公兩度祇奉行靈數

程宿食本界動無遺闕舉必周豐蓋能罄竭於家財務在顯酬夫明獎觀明遠之忠勤若此見思安之悖慢何如關

加恩前朝官寮詔

前朝官寮譴逐南荒積年未經昭雪其間有懷抱材器爲時所嫉者深負冤抑仍令錄其名姓盡復官資兼告諭諸道令津致赴闕如已亡歿並許歸葬以明恩蕩

定封冊禮詔

朝廷之儀封冊爲重用報勲烈以隆恩榮圓合親臨式光典禮彝章久缺自我復行今後每封冊大臣宜令有司備

臨軒之禮稱朕意焉

恤征役詔

潞寇未平王師在野攻戰之勢難緩於寇圍飛輓之勤實勞於人力永言輟耒深用軫懷宜令長吏丁寧布告期以兵罷之日給復賦租

令諸州撲蝗詔

令下諸州去年有蝗蟲下子處蓋前冬無雪今春亢陽致爲災沴實傷隴畝必慮今秋重困稼穡自知多在荒陂榛蕪之內所在長吏各須分配地界精加翦撲以絕根本

卷之二十一  
亢陽修政詔

邇者下民喪禮法吏舞文銓衡既失於選求州鎮又無其舉刺風俗未厚獄訟實繁職此之繇上貽天譴

崇節儉詔

敦尚儉素抑有前聞斥去浮華期臻至理如聞近日貢奉競務奢淫或奇巧蕩心或雕鏤溢目徒殫資用有費工庸此後應諸道進獻不得以金寶裝飾戈甲劒戟至於鞍勒不用塗金及雕刻龍鳳如有此色所司不得引進

定鞍飾等級詔

車服以庸古之制也貴賤無別罪莫大焉應內外將相許  
以銀飾鞍勒其刺史都將內諸司使以降祇取用銅冀定  
尊卑永爲條制仍令執法官糾察之

修祀典詔

祀典之禮有國之大事也如聞官吏慢於展敬禮容牲饌  
有異精虔宜令御史疏其條件以聞

給百官俸料詔

秩俸所以養賢而勵奉公也兵車未戢貢賦莫充朝謁甚  
勤祿廩蓋寡朕今啟建都市已畢郊禋職采至多費用差

少其百官逐月俸料委左藏庫依前例全給

申謝南郊詔

朕自膺眷佑勉副樂推三載於茲多難未弭但蒙靈貺每  
竊休徵致稼穡之有年乃陰陽之克敘昨者以災興右地  
叛結左馮連邠鳳之凶狂據關河之險固王師纔進逆黨  
生擒寸刃未施重門盡啟以致元凶自遁遺壘皆降賊除  
不出於浹旬兵罷匪踰於一月而況時當炎暑路涉惡山  
風迎馬以納涼雲隨車而不雨功因捷速役免滯留非眇  
質之敢當賴上元之垂祐合申告謝用表精虔宜令所司

擇日親拜郊祀

祭告東岳詔

封岳告功前王重事祭天肆覲有國常規朕自以眇身恭臨大寶旣功德未敷於天下而災祥互降於域中慮於告謝之儀有闕齋虔之禮宜修昭報用契幽通宜令中書侍郎同平章事于兢往東岳祭拜禱祀訖聞奏

追贈張策等官詔

追養以祿王者推歸厚之恩欲靜而風人子抱終身之感其以刑部尚書致仕張策及三品四品常參官二十二人

先世各追贈一等

討劉知俊懸爵賞詔

劉知俊貴爲方伯尊極郡王而乃背誕朝恩竄投賊壘固人神之共怒諒天地所不容雖命討除尚稽擒戮宜懸爵賞以大功名必有忠貞咸思憤發有生擒劉知俊者賞錢千萬授節度使首級次之得孟審登者錢百萬除刺史得都將孫坑卓瓊劉儒張隣等賞賜有差

禁僞造犀玉詔

奇邪亂正假僞奪真既刑典之不容宜犯違而勿赦應東

西兩京及諸道州府制造假犀玉珍珠腰帶璧珥并諸色  
售用等一切禁斷不得輒更造作如公私人家先已有者  
所在送納長吏對面毀棄如行勅後有人故違必當極法  
仍委所在州府差人簡察收捕明行處斷

求賢詔

朕聞厯代帝王首推堯舜爲人父母孰比禹湯睿謀高出  
於古先聖德普聞於天下尚或卑躬待士屈已求賢俯仰  
星雲慮一民之遺逸網羅巖穴恐片善之韜藏延爵祿以  
徵求設丹青而訪召使其爲政樂在進賢蓋繇國有萬機

朝稱百揆非才不治得士則昌自朕光宅中區迄今三載宵分輟寐日旰忘餐思共力於廟謀庶永清於王道而乃朝廷之內或未盡於昌言軍旅之間亦罕聞於奇策眷言方岳下及山林豈無英奇副我延佇諸道都督觀察防禦使等或勲高翊世或才號知人必於塗巷之賢備察芻蕘之士詔到可精搜郡邑博訪賢良喻之以千載一時約之以高官美秩諒無求備唯在得人如有卓犖不羈沈潛自負通霸王之上略達文武之大綱究古今刑政之源識禮樂質文之變朕則待之不次委以非常用佐經綸豈勞階

級如或一言拔俗一事出羣亦當舍短從長隨才授任大  
小方圓之器寧限九流溫良恭儉之人難誣十室勉思薦  
舉勿至因循俟爾發揚慰予翹渴仍從別勅處分

遣官分祀風神詔

自朔至今暴風未息諒惟不德致此咎徵皇天動威罔敢  
不懼宜徧命祈禱副朕意焉

嚴關防詔

關防者所以譏異服察異言也況天下未息兵民多姦改  
形易衣覘我戎事比者有謀皆以詐敗而未嘗罪所過地

叛將逃卒竊其妻孥而影附使者亦未嘗詰其所經今海內未同而緩法弛禁非所以息姦詐止奔亡也應在京諸司不得擅給公驗如有出外須執憑縣者其司門過所先須經中書門下點簡宜委宰臣趙光逢專判出給俾縣顯重冀絕姦源仍下兩京河陽及六軍諸衛御史臺各加鈐轄公私行李復不得帶挾家口向西其裏鄧廊延等道並同處分

賑貸滑宋等州詔

滑宋輝亳等州水澇敗傷人戶愁歎朕爲民父母良用痛

心其令本州各等級賑貸所在長吏監臨周給務令存濟

令冀王友謙將兵詔

邠岐未滅關隴多虞宜擇親賢總茲戎重應關西同雍華  
鄜延夏等六道兵馬并委冀王收管指揮凡有抽差先申  
西面都招討使仍別奏聞庶合機權以寧邊鄙

令行營招諭歸降詔

常山背義易水效尤誘其蕃戎動我邊鄙南侵相魏東出  
邢洺是用遣將徂征爲人除害但初頒赦令不欲食言宥  
而伐之諒非獲已況聞謀始不自帥臣致此厲階並繇姦

佞密通人使潛結大戎旣懼罪誅乃生離叛今雖行討伐  
已舉師徒亦開招諭之門不阻歸降之路矧又王鎔處直  
未曾削爵除名若翻然改圖不遠而復必仍舊貫當保前  
功如有率衆向明拔州效順亦行殊賞冀徇來情免令受  
弊於疲民用示惟新於汚俗宜令行營都招討使及陳暉  
軍前準此勅文散加招諭將安衆懼特舉明恩鎮州只罪  
李宏規一人其餘一切不問

處置北面招討使胡規擾民詔

胡規比緣微效遂委劇權不能禁戢諸軍而敢侵凌百姓

輒生狂計欲起亂階備見包藏何堪委用從來凶逆已露  
鋒鏑此際侮輕足量肝膽苟無極斷慮掇後難胡規并男  
義方委宗奭準軍令處置其婦女任從所適都指揮使韓  
勣已下一十二人罰俸有差

嚴懲注擬蠹弊詔

夫興隆邦國必本於人民惠養疲羸允資於令長苟選求  
之踰濫固撫理之乖違如聞吏部擬官中書除授或緣親  
舊所請或爲勢要所干姑徇私情靡求才實念茲蠹弊宜  
舉條章自今以後應中書用人及吏部注擬並宜省藩身

之才業驗爲政之否臧必有可觀方可任用如或尚行請託猶假貨財其所司人吏等必當推窮重加懲斷有司官長別有處分

暑月施恩詔

生育之人爰當暑月乳哺之愛方及薰風儻肆意於剗屠豈推恩於長養俾無殄暴以助發生宜令兩京及諸州府夏季內禁斷屠宰及採捕天民之窮諒由賦分國章所載亦務興仁所在鰥寡孤獨廢疾不濟者委長吏量加賑卹史載葬枯用彰軫惻禮稱掩骼將致和平應兵戈之地有

暴露骸骨委所在長吏差人專功收瘞國瀆之文尚標七  
祀良藥之效亦載三醫用憐無告之人宜徵有喜之術凡  
有疫之處委長吏簡尋醫方於要路曉示如有家無骨肉  
兼困窮不濟者即仰長吏差醫給藥救療之

遣官祈雨詔

亢陽滋甚農事已傷宜令宰臣于兢赴中嶽杜曉赴西嶽  
精切祈禱其近京靈廟宜委河南尹五帝壇風師雨師九  
宮貴神委中書各差官祈之

禁長吏誅求詔

共理庶民是資牧宰克勤厥職必選端良儻徇私以滅公則興災而歛怨豈遵條教實蠹風猷其所在長吏不得因緣差役分外誅求律令所施典刑具在寧容殘忍合務哀矜宜令所在長吏不得淫刑酷法須臻有道免致無辜

求言詔

謗木求規集囊貢事將裨理道豈限側言應內外文武百官及草澤並許上封事極言得失

以潼關仍隸陝州勅

建國稱都俾新其制況山河之險表裏爲防今二京俱在

關東以內仍以潼關隸陝州

禁使臣逗留勅

近年文武官諸道奉使皆於所在分外停住踰年涉歲未聞歸闕非唯勞費州郡抑且侮慢國經臣節既虧憲章安在自今後兩浙福建廣州安南邕容等道使到發許住一月湖南洪鄂黔桂許住二十日荆襄同雍鎮定青滄許住十日其餘側近不過三五日凡來往道路據遠近里數許日行兩驛如遇疾患及江河阻隔委所在長吏具事由奏聞如或有違當行朝典命御史點簡糾察以儆慢官

答錢鏐奏勅

勅鎮東軍牆隍神龐玉前朝名將劇郡良材頃因剖竹之  
辰實有披榛之績躬修府署綏輯吏民豈獨遺愛在人抑  
亦垂名終古況錢鏐任隆三鎮功顯十臣能求福而不回  
致效靈而必應願加懿號以表冥符宜旌峩業之功用顯  
優隆之澤宜賜號崇福侯仍付所司牒至準勅者

許開坊市燃燈勅

近年以來風俗未泰兵革且繁正月燃燈廢停已久今屬  
創開鴻業初建洛都方在上春務達陽氣宜以正月十四

十五十六日夜開坊市門一任公私燃燈祈福

改酸棗等九縣屬開封府勅

自升州作府建邑爲都未廣邦圻頗虧國體其以滑州酸  
棗縣長垣縣鄭州中牟縣陽武縣宋州襄邑縣曹州戴邑  
縣許州扶溝縣鄢陵縣陳州太康縣等九縣宜並割屬開  
封府仍升爲畿縣

升碭山爲赤縣勅

豐沛之基寢園所在悽愴動闢於情理充奉自繫於國章  
宜設陵臺兼升縣望其輝州碭山縣宜爲赤縣仍以本縣

令兼四陵臺令

賞張溫等勅

劉知浣逆黨之中最爲頭角龍虎軍親兵之內實冠爪牙  
昨者攻取潼關率先用命尋則擒獲知浣最上立功頗壯  
軍威將除國難所懸賞格便可支分許賜官階固須除授  
但昨捉獲劉知浣是張溫等二十二人一時向前共立功  
效其賞錢一千貫文數內一百貫文與最先打倒劉知浣  
衙官李稠四十三貫文與十將張溫二十人各與錢四十  
二貫八百五十文立功勅命便授郡府亦緣同時立功人

數不少所除刺史難議偏頗宜令逐月共支給正刺史料  
錢二百貫文數內十將張溫一人每月與十貫文餘二十  
一人每月每人各分九貫文仍起七月一日以後支給人  
與轉官職仍勘名銜分析申奏當與施行

定門禁勅

大內皇牆使諸門素來未得嚴謹將令整肅須示條章宜  
令控鶴指揮應於諸門各添差控鶴官兩人守帖把門其  
諸司使并諸司諸色人等並勒於左右銀臺門外下馬不  
得將領行官一人輒入門裏其逐日諸道奉進客省使於

千秋門外排當訖勒控鶴官昇擡至內門前準例令黃門  
殿直以下昇進輒不得令諸色一人到千秋門內其興善  
門仍令長官關鑼不用逐日開閑

申明門禁勅

皇牆大內本尚深嚴宮禁諸門豈宜輕易未當條制交下  
因循苟出入之無常且公私之不便須加鈐轄用戒門閭  
宜令宣徽院使等切準此處分